

Ilaqutariit paarsisartut pillugit Namminersorlutik Oqartussat nalunaarutaat

Meeqqat tapersorsorneqarnissaannut Inatsisartut inatsisaanni nr. 20, 26. juni 2017-imeersumi § 37, imm. 7 aamma § 39, imm. 6 aalajangersarneqarput:

Kapitali 1

Kommunip aaqqissuussaanik ilaqutariit paarsisartut

§ 1. Ilaqutariit qanigisaasut paarsisartut tassaapput, ilaqutariit namminneq angerlarsimaffimminni meeqqamut aalajangersimasumut qanigisaanertik pissutigalugu paarsisartut, meeqqamik isumassuisuullutillu paarsisuusut, imaluunniit Meeqqat tapersorsorneqarnissaannut Inatsisartut inatsisaat naapertorlugu imaluunniit Inuit innarluutillit tapersorsorneqarnissaannut Inatsisartut inatsisaat naapertorlugit oqilisaanneqartussamik isumassuisuullutillu paarsisuusut.

Imm. 2. Ilaqutariit qanigisaasut paarsisartut angajoqqaatut akisussaassuseqarnermik ilaqutariilluunniit inoqutaannik allanik ulloq unnuarlu najugaqartitsisinnaangillat.

§ 2. Ilaqutariit kommunip aaqqissuussaanik paarsisartut, tassaapput ilaqutariit meeqqamik ilaqutariinnut inissinneqarsimasumik, imaluunniit Meeqqat tapersorsorneqarnissaannut Inatsisartut inatsisaat naapertorlugu imaluunniit Inuit innarluutillit tapersorsorneqarnissaannut Inatsisartut inatsisaat naapertorlugit oqilisaanneqartussamik isumassuisuullutillu paarsisuusut.

Imm. 2. Aamma ilaqutariit kommunip aaqqissuussaanik paarsisartut angajoqqaatut oqartussaassuseqartumik ilaqutariilluunniit inoqutaannik allanik ulloq unnuarlu najugaqartitsisinnaapput.

§ 3. Ilaqutariit kommunip aaqqissuussaanik inuussutissarsiutigalugu paarsisartut tassaapput, ilaqutariit paarsisartut arlaat pinngitsoorani isumaginninnermik ilinniarsimasuusoq allatulluunniit isumaginninnermut sanilliunneqarsinnaasumik misilittagaqartuusoq.

Imm. 2. Angajoqqaarsiat arlaat isumaginninnikkut assigisaanilluunniit ilinniarsimasuusoq, taamaallaat allamik inuussutissarsiutigalugu suliffeqarsinnaavoq piffissami meeqqap paarineqartup meeqqalluunniit paarineqartut ulluunerani paaqqinnittarfimmiinneranni atuarnerranniluunniit.

Kapitali 2

Ilaqutariinnut paarsisartunut akuersissut

§ 4. Ilaqutariit paarsisartut, ilaqutariinnut paarsisartunut akuersissummik peqarunik aatsaat meeqqamik ataatsimik tiguisinnaallutillu paarsaqarsinnaapput.

Imm. 2. Ilaqutariinnut paarsisartunut akuersissut kommunimi ilaqutariit paarsisartut najugarisaanni kommunalbestyrelsimit tunniunneqassaaq.

Imm. 3. Ilaqutariinnut paarsisartunut akuersissut allakkatigut tunngavilersorlugu nalunaarutigineqassaaq.

Ilaqutariit paarsisartut meeqqanik qassinik tiguisinnaanerit ilaqutariinnut paarsisartunut akuersissummi allaqqassaaq.

§ 5. Kommunalbestyrelsip ilaqutariinnut paarsisartunut akuersissummik tunniussaqaarnissamik aalajangiinnermini ilaqutariinnut qinnuteqartunut ilaqutariit katitigaanerit pillugu pissutsit misissuinnermi tunngavigissavaa. Kommunalbestyrelsip misissuinnermini, ilaqutariit pineqartut meeqqamik ataatsimik arlaqartunilluunniit paarsassanik tiguisinissamut qanoq naleqqutsiginerat nalilissavai.

Imm. 2. Kommunalbestyrelsip imm. 1 malillugu misissuinnermini pissutsit ilaatigut makkua ilaqutariit qanoq naleqqutsiginerannik naliliinnermi ilanngutissavai:

- 1) Ilaqutariit ilaqutariittut atugaat.
- 2) Ilaqutariit ilinniagaat.
- 3) Ilaqutariit suliffeqarnerannut tunngasut.
- 4) Angajoqqaat inooqatigiinnerat.
- 5) Angajoqqaat ukiui.
- 6) Angajoqqaat meeraqarsimappata taakku matumani aamma qassiuneri ukiuilu.
- 7) Ilaqutariit attaveqarfii.
- 8) Ilaqutariit ineqarnerannut tunngasut, matumani aamma angerlarsimaffik peqqinnissaq eqqarsaatigalugu isumannaatsuunersoq.
- 9) Ilaqutariit angerlarsimaffiata avatangiisii, matumani aamma sunngiffimmi periarfissat, atuarfik il.il.
- 10) Ilaqutariit peqqissusiannut tunngasut.
- 11) Pinerluuteqarsimanermut tunngasut.
- 12) Ilaqutariit aanngajaarniutitik atuinerat.
- 13) Ilaqutariit aningaasaqarnerannut tunngasut.
- 14) Angajoqqaat perorsaaneq pillugu isumaat.
- 15) Ilaqutariit paarsisuunissamik akuersissummik qinnuteqarnerat sumik tunngaveqarlunilu pissuteqarneraq.

Imm. 3. Ilaqutariit inuussutissarsiutigalugu paarsisartuunissamik qinnuteqarsimappata, kommunalbestyrelsip aammattaaq nalilissavaa, angajoqqaat arlaat pinngitsoorani isumaginninnermik ilinniarsimasuunersoq allatulluunniit isumaginninnermut sanilliunneqarsinnaasumik misilittagaqartuunersoq.

Imm. 4. Imm. 2, nr. 10 malillugu kommunalbestyrelsip ilaqutariinni inoqutaasut ilaat ataaseq arlaqartulluunniit peqqissutsimut uppersarsaammik qinnuigisinnaavai, tamanna naliliinnermut atatillugu pisariaqarsorineqarpat. Peqqissutsimut uppersarsaat qaammatinit 3 pisoqaanerussanngilaq.

Imm. 5. Kommunalbestyrelse Pinerluuteqarsimasunik Nalunaarsuiffimmit uppersarsaammik kiisalu ilaqutariinni inoqutaasunut 15-inik taakkualuunniit sinnerlugit ukiulinnut tamanut tunngatillugu meeqqanik pinerliisimannginnermut uppersarsaammik imm. 2, nr. 11 malillugu naliliinnermut atatillugu piniassaaq.

Imm. 6. Imm. 2, nr. 12 naapertorlugu kommunalbestyrelsip aanngajaarniutitik atuisuunermik misissuineq naliliinnermut atatillugu aallartissavaa. Kommunalbestyrelsip aanngajaarniutitik atuisuunermik misissuinnissaq sioqqullugu, inuk aanngajaarniutitik atuisuunermik misissortittussaq akuersiseqqaassavaa. Aanngajaarniutitik atuisuunermik misissuineq peqqinnissaqarfimmi periusiusut nalinginnaasut malillugit tamatigut pisassaaq.

Imm. 7. Imm. 2, nr. 13 malillugu kommunalbestyrelsip ilaqutariit aningaasaqarnerat meeqqat

ilaqutariinnit paarineqartussatut inissinneqartut aalajaatsumik atugaqarnissaannik tunngavissiinersoq naliliinermut atatillugu qulakkiissavaa.

§ 6. Inoqutaasut arlaat eqqartuunneqarsimappat imaluunniit eqqartuussinertaqanngitsumik aalajangiisoqarsimappat, taassuma ataani akiligassinneqarsimappat, Kalaallit Nunaanni pinerluttulerinermi inatsimmi kapitali 17-18 pinerluuteqarsimasutut akiligassinneqarsimappat ilaqutariinnut paarsisartunut kommunalbestyrelse akuersisummik tunniussaqaarsinnaanngilaq.

Imm. 2. Inoqutaasut arlaat Kalaallit Nunaanni pinerluttulerinermi inatsimmi kapitali 9-11, 15 imaluunniit 19-20 pinerluuteqarsimasutut ukiut qulit kingulliit iluanni pineqaatissinneqarsimappat imaluunniit eqqartuussinertaqanngitsumik aalajangiisoqarsimappat, taassuma ataani akiligassinneqarsimappat ilaqutariinnut paarsisartunut kommunalbestyrelse akuersisummik tunniussaqaarsinnaanngilaq. Piffissaq eqqartuussinermi suliap naammassineqarnerata nalunaarutigineqarneranit naatsorsorneqassaaq.

Imm.3. Inoqutaasut arlaat eqqartuunneqarsimappat imaluunniit eqqartuussinertaqanngitsumik aalajangiisoqarsimappat, Kalaallit Nunaanni pinerluttulerinermi inatsimmi kapitali 9-11-mut, 15-imut imaluunniit 19-20-mut pinerluuteqarsimasut, aamma imm.2 malillugu piffissaq qaangiussimappat, ilaqutariinnut paarsisartunut kommunalbestyrelse akuersisummik tunniussaqaarsinnaanngilaq, naliliinermi aalajangersimasumi isumaqartoqarpat, ilaqutariittut paarsisartuunissamut pingaaruteqartoq.

Imm. 4. Ilaqutaasut arlaat ukiut kingulliit tallimat iluanni allatut ittumik pinerluuteqarsimappat imaluunniit pinerluutinik allanik pinerluuteqarsimappat eqqartuussinertaqanngitsumik aalajangiisoqarluni, taassumalu ataani akiligassinneqarsimappat, ilaqutariinnut paarsisartuunissamut akornutaasussamik, kommunalbestyrelse akuersisummik tunniussaqaarsinnaanngilaq. Piffissaq inaarutaasumik nalunaarutigineqarneraniit naatsorsorneqassaaq.

§ 7. Kommunalbestyrelse ilaqutariinnut paarsisartunut akuersissuteqarnissamini piumasaqaatinik aalajangersaasinnaavoq. Makkua pillugit piumasaqaatit aalajangersarneqarsinnaapput:

- 1) Ilaqutariinnut paarsisartunut tunngasut.
- 2) Meeqqat ilaqutariit paarsassamissut tigusinnaasaasa amerlassusissaat.
- 3) Meeqqat ilaqutariit paarsassamissut tigusinnaasaasa qanoq pisariaqartitsitiginissaat.

Imm. 2. Imm. 1 malillugu piumasaqaatit siunertaasumit oqimaannerussanngillat.

§ 8. §§ 1-3-mut naapertorlugit ilaqutariit paarsisartut ilaqutariinni pissutsinik pillugit allannguuteqartoqartillugu kommunalbestyrelsimut piaartumik nalunaaruteqarnissamut pisussaaffeqarput, § 4, imm. 2 naapertorlugu kommunalbestyrelsimut ilaqutariittut paarsisartuunissamut akuersissuteqartumut.

Ilaqutariinnut paarsisartunut akuersisummik utertitseqqusineq

§ 9. § 4 naapertorlugu ilaqutariinnut paarsisartunut akuersisummi piumasaqaatit atuukkunnaarsimappata akuersissutip utertinneqarnissaa kommunalbestyrelsip ilaqutariit najugaqarfīgisaaniittup aalajangissavaa.

Imm. 2. Akuersissutip utertinneqarnissaa kommunalbestyrelsip ilaqutariinnik paarsisartunik nakkutilliineranut atatillugu, imaluunniit kommunalbestyrelsip ilaqutariinnut paarsisartunutakuersisummi piumasaqaatit atuukkunnaarsimanerat allatigut paasippagu atorunnaarsinneqarsinnaavoq.

Imm. 3. Kommunalbestyrelsip ilaqutariinnut paarsisartunutakuersissutip utertinneqarnissaanik aalajangiisup kommunalbestyrelse kommunalbestyrelsilluunniit, meeqqamik ilaqutariinnut inissiiissamik

aalajangiisimasut sapinngisamik piaarnerpaamik ilisimatissavai.

Imm. 4. Kommunalbestyrelsip ilaqutariinnut paarsisartunutakuersissummik utertitsinissamik aalajangiinnermini, meeqqap meeqqalluunniit ilaqutariinnut paarsarineqartut nuutsinneqarnissaannut piffissaliussaq naammaginartumik sivilissusilik aalajangissavaa. Piffissaliussaq meeqqap ukiuminut naleqquttumik sutigut tamatigut alliartorneranut, peqqissusaanut ineriartorneranullu naleqquttumik, nutaanik inissiivissamik tulluurtunik nassaarnissaq kiisalu pissutsit ilaqutariinnut paarsisartunutakuersissummik atorunnaarsitsinissamut pissutaasut eqqarsaatigalugit aalajangerneqassaaq.

§ 10. Ilaqutariit paarsisartut pikkorissarnerni ilinniaqqinnernilu §§-ini 17-imi 18-amilu pineqartuni peqataasarnissamik piumasaqaatinik eqquutsitsinngippata ilaqutariinnut paarsisartunut akuersissutip utertitsinneqarnissaa kommunalbestyrelsip aalajangissavaa.

Imm. 2. Kommunalbestyrelsip imm. 1 malillugu utertitsinissamik aalajangiisoqannginnerani ilaqutariit paarsisartut, pikkorissarnerni ilinniaqqinnernilu §§-ini 17-imi 18-amilu pineqartuni peqataasarnissamik piumasaqaatit qanoq eqquutsinneqarsinnaanerit pillugu oqaloqatigeqqaassavai.

Imm. 3. Ilaqutariinnut paarsisartunutakuersissutip utertitsinissaa imm. 1 malillugu aalajangiinnermi § 9, imm. 4 aamma 5 atuutissapput.

§ 11. Ilaqutariit paarsisartut piffissami ukiunik 3-nik sivilissusumik meeqqanik paarsaqarsimanngippata, ilaqutariinnut paarsisartunutakuersissutip utertitsinissaa kommunalbestyrelsip aalajangissavaa.

Kapitali 3

Paarsisuunissamut akuersissut aamma ilaqutariinni paarsisartuni inissiinnermut isumaqatigiissut

Paarsisuunissamut akuersissut

§ 12. Ilaqutariit kommunip aqqissuussaanik paarsisartut, meeqqamut pineqartumut paarsisuunissamut akuersissummik peqarunik aatsaat meeqqamik ataatsimik tigussinnaallutillu paarsinnaapput.

Imm. 2. Paarsisuunissamut akuersissut allakkatigut tunngavilersorlugu nalunaarutigineqassaaq.

§ 13. Kommunalbestyrelsip paarsisuunissamut akuersissummik tunniussaqaarnissamik aalajangiinnermini, ilaqutariit pineqartut meeqqap tapersorsorneqarnissamik, isumassorneqarnissamik paarineqarnissamillu pisariaqartitaanik naammassinninnissamut qanoq naleqqutsiginerat nalilissavaa. Kommunalbestyrelsip naliliinnermini ilaatigut ilanngutissavai:

1) § 4. Imm. 3 naapertorlugu meeqqat ilaqutariit paarsarinnaasaasa amerlassusiat, ilaqutariinnut paarsisartunut akuersissummi allassimasoq.

2) Meeqqat ilaqutariit paarsassatut inissinneqareersimasut amerlassusaa.

3) Meeqqap tapersorsorneqarnissamik, isumassorneqarnissamik paarineqarnissamillu pisariaqartitai.

4) Ilaqutariit meeqqap tapersorsorneqarnissamik, isumassorneqarnissamik paarineqarnissamillu pisariaqartitaanik naammassinninnissamut piginnaasaat.

5) Meeqqap inatsisit allat, naapertorlugit tapersorsorneqarnissamik pisariaqartitsinera, meeqqallu ilaqutariinni paarsisartuni taamatut tapersorsorneqarnissaminut periarfissai.

§ 14. § 12 naapertorlugu ilaqutariit paarsisartut ilaqutariinni pissutsinik pillugit allannguuteqartoqartillugu kommunalbestyrelsimut imaluunniit kommunalbestyrelsinut piaartumik nalunaaruteqarnissamut pisussaaffeqarput kommunalbestyrelsimut meeqqamut aalajangersimasumut ilaqutariittut paarsisartuunissamut akuersissuteqartumut.

Paarsisuunissamut akuersissummik atorunnaarsitsineq

§ 15. § 12 naapertorlugu paarsisuunissamut akuersissummi piumasaqaatit atuukkunnaarsimappata, matumani pingaartumik aamma meeqqap najugaqarnini iluaqutigingippagu akuersissutip utertitsinneqarnissaa kommunalbestyrelsip inissiisup aalajangissavaa.

Imm. 2. Meeqqat tapersersorneqarnissaannut Inatsisartut inatsisaat § 8, imm. 2 naapertorlugu, meeqqap ilaqutariinni najugaqarnerani kommunalbestyrelsip nakkutilliineranut atatillugu, imaluunniit kommunalbestyrelsip paarsisuunissamutakuersissummi piumasaqaatit atuukkunnaarsimanerat allatigut paasippagu akuersissutip utertitsinneqarnissaa aalajangersinnaavaa.

Imm. 3. Kommunalbestyrelsip paarsisuunissamutakuersissutip utertitsinneqarnissaa aalajangiisup, kommunalbestyrelse ilaqutariinnut paarsisartunut akuersissummik ilaqutariinnut tunniussisimasog tuaviernerpaamik ilisimatissavaa.

Imm. 4. Kommunalbestyrelsip paarsisuunissamikakuersissummik utertitsinissamik aalajangiinnermini, meeqqap ilaqutariinnit paarsarineqartup nuutsinneqarnissaanut piffissaliussaq naammaginantumik sivilissusilik aalajangissavaa. Meeqqap pisariaqartitaanut naapertuuttumik piffissaliussaq inissinneqassaaq, meeqqamik inissiivissatut naleqquttumik nassaarsinnaaneq, kiisalu pissutsit paarsisuunissamutakuersissummik atorunnaarsitsinermut pissutaasut eqqarsaatigalugit aalajangerneqassaaq.

Imm. 5. Kommunalbestyrelsip meeraq tuaviernerpaamik ilaqutariinnit paarsisartunit peersissavaa, tunngavilersukkamik pasitsaassaartoqarpat meeqqap ukiuminut naleqquttumik sutigut tamatigut alliartornerata, peqqissusaata ineriartorneratalu ajoqusersinnaanera pasitsaanneqarpat makkuninnga:

- 1) meeqqap naammangitsumik isumassorneqarnera imaluunniit passunneqarnera,
- 2) timikkut tarnikkullu persuttaaneq, paarsinerlunneq kinguaassiuutitigulluunniit innarliineq,
- 3) atuipilunermik ajornartorsiutit, pinerlunniartutut pissusilersornerit allatigulluunniit meeqqap inooqataanerani meeqqap avangiisaani ajornakusoorutit annertuut imaluunniit,
- 4) meeqqap nammineq imaluunniit meeqqap avangiisaani allatigut pissusilersornerani naleqqussarniarneraniluunniit ajornartorsiutit.

Ilaqutariinni paarsisartuni inissiinermut isumaqatigiissut

§ 16. Meeqqap ilaqutariittut paarsisartuni inissinginnerani, kommunalbestyrelse pisussaavoq ilaqutariinni paarsisartuni inissiinermut isumaqatigiissutip suliarineqarnissaa atsiortinnissaalu isumagissallugu.

Imm. 2. Ilaqutariinni paarsisartuni inissiinermut isumaqatigiissut aalajangersakkanik minnerpaamik makkuninnga imaqaassaaq:

- 1) §§ 21-22 naapertorlugit paaqqinninnersiutit
- 2) aningaasartuutaasinnaasut immikkut ittut allat
- 3) taamaatitsinermut malittarisassat
- 4) sillimasiinermut tunngasut
- 5) meeqqamik suleqateqarnissaq
- 6) suliamillu ilisimasalinnit ikorfartuineq
- 7) nakkutilliineq, ilitsersuineq ilinniartitsinerlu.

Kapitali 4

Ilinniartitsineq ilitersuinerlu

Tunngaviusumik pikkorissarneq

§ 17. § 1-3-mut naapertorlugit ilaqutariit paarsisartut Isumaginninnermut Aqutsisoqarfiup tunngaviusumik pikkorissartitsinera naammassisimassavaat. Angajoqqaarsiat tamarmik pikkorissarneq naammassisimassavaat.

Imm. 2. § 5 naapertorlugu ilaqutariit paarsisartut, ilaqutariinnut paarsisartunut akuersissutip siullermeersumik tunniunneqarneranut atatillugu tunngaviusumik pikkorissarnermik naammassinissimassapput. Imaappoq ilaqutariit paarsisartut piffissap akuersissummik peqanngiffimmik kingorna ilaqutariinnut paarsisartunut akuersissummik nutaamik qinnuteqarunik tunngaviusumik pikkorissaqqissanngillat. Pissutsilli immikkut ittut atuutsillugit taamaaliornissaq kommunalbestyrelsip piumasarisinnaavaa.

Imm. 3. Ilaqutariit meeqqanik paarsassaannik tigusitinnagit tunngaviusumik pikkorissarneq naammassineqarsimassaaq, pissutsit immikkut ittut atuutinngippata. Ilaqutariit paarsisartut pikkorissarneq suli naammassineqanngitsoq meeqqamik tiguspata, tamatuma kingorna sapinngisamik piaarnerpaamik pikkorissartinneqassapput.

Imm. 4. Tunngaviusumik pikkorissarnerup sivissusaata innerpaamik ullut pikkorissarfiusut ilivitsut 4 naligissavai.

Imm. 5. Tunngaviusumik pikkorissarnermut aningaasartuutit, tamatuma ataani angalanermut akunneqqanermullu aningaasartuutit, kommunalbestyrelsimit pikkorissartitsisumit ilaqutariit paarsisartut najugaqarfigisaannit akilerneqassapput.

Imm. 6. § 10 naapertorlugu, tunngaviusumik pikkorissarnermik naammassinissimannginneq ilaqutariinnut paarsisartunut akuersissutip utertitsinneqarnissaanik aalajangernissamut tunngaviusinnaavoq.

Ilinniaqqinneq

§ 18. § 4 naapertorlugu kommunalbestyrelsip paarsisuunissamut akuersissummik ilaqutariinnut paarsisartunut tunniussaartup, ilaqutariit paarsisartut ilinniaqqinnissaannik neqeroofgissallugit pisussaaffigivaa. Ilaqutariit paarsisartut ilinniaqqinnermut peqataanissartik pisussaaffigaat.

Imm. 2. Imm. 1 malillugu ilinniartitseqqinneq ukiumut ataasarluni Isumaginninnermut Aqutsisoqarfimmit ingerlanneqartassaaq.

Imm. 3. Ilinniaqqinnermut aningaasartuutit, matumani angalanermut akunneqqanermullu aningaasartuutit kommunalbestyrelsimit akilerneqassapput.

Ilitersuineq suliamillu ilisimasalinnit ikorfartorneqarneq

§ 19. § 12 naapertorlugu kommunalbestyrelsi paarsisuunissamut akuersissummik tunniussaartup ilaqutariit paarsisartut paarsinermi suliammut naapertuuttumik ilitersorneqarnissaannik suliamillu ilisimasalinnit ikorfartorneqarnissaannik neqeroofgissallugit pisussaaffigaa. Ilaqutariit paarsisartut ilitersuinermit peqataanissartik pisussaaffigaat.

Imm. 2. Meeraq kommunimi allami ilaqutariinni paarsisartuni inissinneqarpat, kommune inissiiviusimasoq kommunalbestyrelsimut ilaqutariit paarsisartut kommunemi najugaqarfigisaanni isumaqatigiissusiorsinnaavoq, ilaqutariit paarsisartut pisariaqartitaannik ilitersuinermit

tapersersuinermillu kommunalbestyrelsi sinnerlugu neqeroorfigissagai.

Imm. 3. Imm. 2 naapertorlugu, isumaqatigiissuteqartoqarsimappat ilitersuineq suliamillu ilisimasalinnit ikorfartorneqarnissamik, kommune inissiiviusoq nakkutilliinissaminut pisussaaffilerneqassaaq, imm. 1 naapertorlugu ilaqutariit paarsisartut ilitersorneqarnissamik suliamullu tunngasumik tapersersorneqarnissamik neqeroorfigineqarnissaat paarsinerup suliassartaata annertoqataanut naapertuuttumik.

Kapitali 5

Aningaasanut tunngasut

Nerisassarsiutissat, kaasarfimmussat atisassarsiutissallu

§ 20. Kommunalbestyrelse meeqqamik ilaqutariinnut paarsisartunut inissiisoq, nerisassarsiutissanik, kaasarfimmussanik atisassarsiutissanillu ilaqutariinnut paarsisuusunut, meeqqap pilersorneqarneranut atugassanik tunniussaqartassaaq.

Imm. 2. Nerisassarsiutissat, kaasarfimmiut atisassarsiutissallu qaammatikkaartumik siumoortumik tunniunneqartassapput.

Imm. 3. Nerisassarsiutissat, kaasarfimmiut atisassarsiutissallu taaneqartut amerlassusissaat ukiumut ataasiartumik Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoqarfimmit annertussusilerneqartarput.

Ilaqutariit paarsisartut aningaasarsiaat

§ 21. Imm. 2 naapertorlugu kommunalbestyrelsip inissiisup ilaqutariit paarsisartut paaqqinninnersiuteqartissavai. Paaqqinninnersiutit ilaqutariinnut paarsisartunut akissarsiaapput, taamaattumillu meeqqap pilersorneqarneranut atugassaanatik.

Imm. 2. Imm. 1 ilaqutariinnut inuussutissarsiutigalugu paarsisartunut atuutinngilaq.

Imm. 3. Kommunalbestyrelsip inississimasup aalajangersimappagu meeraq efterskolissasoq allatulluunniit atuarfimmisasoq, meeqqap angajoqqaarsiai meeqqap atuarfimmiinnerata naammassivinnissaata tungaanut appartitanik akissarsiaqartinneqassapput, meeqqap atuarnerani piareersimasutut inississimasussaammata.

§ 22. § 21 naapertorlugu paaqqinninnersiutit, qaammammut kingumoortumik tunniunneqartassapput.

Imm. 2. § 21 naapertorlugu, paaqqinninnersiutit aannertussusissaat Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoqarfimmit ukiumoortumik annertussusilerneqartarput.

Imm. 3. Imm. 2 naapertorlugu. Meeqqamik ilaqutariinnut paarsisartunut inissiineq, perorsaaneq isumassuinerlu eqqarsaatigalugit ilaqutariinnut paarsisartunut immikkut perorsaanikkut isumassuinikkullu suliniarnartuuppat paaqqinninnersiutit Naalakkersuisoqarfimmit annertussusilerneqartut, 50 pct.-imik 100 pct.-imilluunniit qaffanneqarnissaat kommunalbestyrelsip aalajangersinnaavaa.

Imm. 4. Nukinginnartumik sivikitsumik ullut 30-t tikillugit inissiisoqartillugu kommunalbestyrelse paaqqinninnersiutinik annertusisanik tunniussisassaaq.

§ 23. Kommunalbestyrelsip ilaqutariit inuussutissarsiutigalugu paarsisartut isumaqatigiissutit atuuttut naapertorlugit akissarsiaqartissavai.

Kapitali 6

Atuutilersitsineq ikaarsaariarnermilu aalajangersakkat

§ 24. §§ 1-3-mut naapertorlugit ilaqutariit kommunip aaqqissuussaaniik paarsisartut, meeqqamik ataatsimik arlaqartunilluunniit paarsaqareersut, paarsaqarnerlu kommunalbestyrelsip sulissutigisimappagu, § 4 naapertorlugu ilaqutariinnut paarsisartunut akuersisummik, kingusinnerpaamik ulloq 9. november 2018-imi tunineqassapput, aammattaarlu § 16 naapertorlugu tunngaviusumik pikkorissarsimassallutik. Kommunalbestyrelse ilaqutariit paarsisartut kommunimi najugallit ilaqutariinnut paarsisartunut akuersisummik tunineqarnissaat sulissutigissallugu pisussaaffeqarpoq.

Imm. 2. Meeqqat ilaqutariinni paarsisartuni ulloq 9. november 2017 nallertinnagu najugaqareersut ilaqutariinni paarsisartuni taakkunaniinnertik ulloq 9. november 2018 tikillugu ingerlatiinnarsinnaavaat, ilaqutariit paarsisartut ilaqutariinnut paarsisartunut akuersisummik piffissami tassani peqanngikkaluarpataluunniit.

Imm. 3. §§ 16-imiit 18-imut 9. november 2017-imeersoq aallarnerfigalugu atuuttut naapertorlugit Imm. 1-imi ilaqutariit paarsisartut ilinniaqqinnissamut, ilitsersorneqarnissamut suliamillu ilisimasalinnit ikorfartorneqarnissamut pisinnaatitaaffeqarlutillu pisussaaffeqarput.

§ 25. Nalunaarut 9. november 2017-imi atortuulerpoq.

Namminersorlutik Oqartussat, ulloq 8. novemberi 2017

Sara Olsvig

/

Julie Præst Wilche

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

